



Meeqqat atuarfianni alloriarfinni tamani atuartut akornanni kinguaassiutitigut piumassuseqarnerup qanoq issusianut, kinguaassiutitigut nappaatinut, kissaatiginngisamik naartulertarnermut, killiliisarnissaannut kiisalu timikkut digitalitigullu innimilliuutinut ilisimasanut tunngatillugu Naalackersuisut misissuinissamik suliaqaqqullugit Inatsisartut aalajangiiffigisassaatur siunnersuut. Misissuinermit inernerit 1. januar 2022 nallertinnagu saqqummiunneqassapput.

(Inatsisartunut ilaasortaq Stine Egede, Inuit Ataqatigiit)

(siull.)

Qarasaasiami inuinnaat naapittarfiini qanoq pissusilersornissamut immitsinnullu oqaloqatigiittarnitsinnut sammisalimmik paasititsiniaanermik suliaqarnissamut, aallartitsinissamullu Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Nivi Olsen, Demokraatit)

(siull.)

Siunnersuutinut ukununga soqutigintartunut siunnersuuteqartumut qujavunga.

Inatsisartunut ilaasortaq Stine Egede (IA) siunnersuutai pillugit ima oqaaseqassaagut. Inuusuttut kinguaassiutitigut ilisimasai kanngutsaatsuliornerillu pillugit ilisimasai eqqarsaatigalugit ukkatarinninnissaq pingaaruteqartorujussuusoq isumaqarpugut. Isumaqaataavugut inuusuppallaarlutik naartulertartut amerlavallaartut tassungalu malitsigineqartarluni naartuersittarnerit aammalu kinguaassiutitigut nappaateqalartartut ernumanaannartumik amerlasoorujussuullutik.

Taamaattorli maluginiarparput ajornartorsiut Naalackersuisunit annertuumik ukkatarineqartoq, maanngaanniillu pissutsit allanngortinnissaat anguniarlugu suliniartoqartoq. Inuuneritta III, tassaasoq 2020-2030 meeqqat inuunerissuunissaat pillugu suleqatigiinnermut Naalackersuisut iliuusissaat, ajornartorsiutinik tassunga ilaallutik meeqqat kinguaassiutitigut peqqissusaannik siuarsaanissamut suliniutit annertuumik ukkatarineqarput. Demokraatit upperilluinnarpaat taamatut suliniuteqarneq pitsaasunik inerneqartinneqarumaartoq.

Taamaammatt nalunaarutigissavarput Naalackersuisut allannguutissatut siunnersuutaat taperseratsigu, taamaattumillu Ilaqutariinnermut Peqqissutsimullu Ataatsimiititaliamut suliarisassanngorlugu innersuullugu.

Demokraatit Inatsisartunut ilaasortaata Nivi Olsenip siunnersuutaanut tunngatillugu isumaqaataasorujussuuvugut qarasaasiatigut inuit naapittarfiini pissusilersornerit amerlanertigut sakkortuallaarujussuurtut. Siunnersuuteqartup assersuutitut atugai ilimanarpoq ilaminiinnannguarigai. Matoqqasuni pissutsit atugarineqartut ajornerujussuupput soorlu Facebookimi.



Tamatuma saniatigut pingaartippara eqqaassallugu, eqqaamasariaqaripput qarasaasiap saqqaata illuatungaani inummik issiasoqarmat – inuk misigissusilik. Facebookimi assigiingitsorpassuit allaaserineqartarput, uffa inuk "eqqorniagartik" toqqartumik isigigunikku taamak oqarfiginaviarnagu. Taamaammat pingaaruteqarpoq paasititsiniutissani pisut tamakku ukkatarineqarnissaat. Tamatuma saniatigut ilanngutissallugu pissusissamisoorpoq inuk toqqarlugu oqarfiginagu qarasaasiatigut inuit naapittarfiini allataqarnissaq ajornanngippallaarlunilu akikipallaarujussuarnera ukkatarineqartariaqartoq. Taamaaliornikkut imaassinnaasoq inunnik eqqarsalersitsisinnaasoq Facebookikkut assigisaatigulluunniit annernarsinnaasunik allataqannginnerini.

Isumaqarpungalu pingaaruteqartoq qarasaasiatigut inuit naapittarfiini pissuserissaartartuusut killilleeqataasassasut nuanninngitsunik allataqarsimasunik naammattuuigaangatta. Isumaqarpunga iluaqutaassasoq eqqunngitsumik pisut ataatsimoorluta eqqumaffigisalerutsigit.

Tamanna tunngavigalugu Demokraatit isumaqarput, qarasaasiatigut inuit naapittarfiini paasititsiniaanernik aallartitsisoqarnissaa isumassarsiatsialaasoq, taamaaliornikkut sullinniakkanut angussinissaq qulakkeerneqassaaq.

Isumaqarpugut paasititsiniaanermik taamak ittumik aallartitsipallassinnaassasugut, isumaqarpugullu sallionneqartariaqartoq aallartisarneqarlunilu. Naalakkersuisut allannguutissatut siunnersuutaat tunngaviusumik ajoqutissartaqanngikkaluarpoq, kisianni maannakkut iliuuseqartoqarnissaanut oqariartuuteqanngilaq. Oqareernitsituullu isumaqarpugut piaartumik iliuuseqartoqassasoq.

Tamanna tunngavigalugu Inatsisartunut ilaasortap Nivi Olsen-ip siunnersuutaa akuerisassanngorlugu innersuussutigaarput kiisalu Ilaqutariinnermut Peqqissutsimullu Ataatsimiititaliamut suliassanngortillugu.